

## Nirxandina Helbestên Zarokan ên Kurdi li Gorî “Rastîya Zarokan” û “Îzafîyeta Zarokan”

Kenan SUBAŞI<sup>1</sup>

### “Çocuk Gerçekliği” ve “Çocuğa Görelilik” Bağlamında Kürtçe Çocuk Şîrlerinin İncelenmesi

#### Öz

Bu çalışmada çocuk edebiyatının iki temel unsuru bağlamında analitik bir değerlendirme yapılacaktır. Bu unsurlar “çocuk gerçekliği” ve “çocuğa görelilik” olarak belirtilir ki modern çocuk edebiyatının temel taşlarını oluştururlar. Çocuğun kendine özgü bir yapısı olduğundan çocuk edebiyatı yazarı, eserlerinde çocuğun bu özgün yapısını iyi tanımaları gereklidir. Çünkü sonuça bahsedilen edebiyatın birinci derecede muhatabı çocuklardır. Bununla beraber çocuğa edebi bir estetik ve arzu kazandırmak adına yazılan çocuk edebiyatı eserlerinin yine bu iki unsuru çok iyi özümsemiş olması gereklidir. Bu esaslar üzere çalışmamızda Kürtçe çocuk şîrleri belirtilen bu iki temel unsura göre incelenecelerdir. Bu çalışmada ele alınacak şairler; bu alandaki ilk dönem modern şairlerden olan Zêwer, Goran, Kakeyi Felah, Kamiran Elî Bedirxan, Letîf Helmet, Elî Ebdulla Şewnim ve son dönemde çocuk şîri yazma geleneğini devam ettiren Emîn Muhemed, Taha Bîlal, Elî Hemereşîd Berzîncî, Osman Muhemed Hewramî, Fırat Cewerî, Konê Reş, Yehya Elewîferd, Aram Gernas ve Mueyed Teyîb gibi şâhsiyetler ve eserleri olacaktır. Bu şairlerin belli başlı şîrleri alıntılanacak ve başta bahsedilen iki temel unsura göre ne kadar başarılı olup olmadıkları değerlendirilecektir. Özellikle bu şairlerin seçilmesi kendi dönemlerinde çocuk şîri alanında en çok öne çıkan isimler olmalarıdır. Elbette bu şairlere yenileri de eklenebilir. Fakat bir makalenin boyutunu aşacağından bu çalışmaya yukarıdaki isimlerle sınırlı kaldı ve yukarıda adı geçen şairleri yaşadıkları tarihi dönem, sosyal ve siyasal olaylar bağlamında dört dönem içinde bölüştürerek değerlendirdik.

**Anahtar Kelimeler:** Şiir, Çocuk, Kürtçe, Çocuk Gerçekliği, Çocuğa Görelilik.

<sup>1</sup> Dr. Arş. Gör., Mardin Artuklu Üniversitesi Türkiye'de Yaşayan Diller Enstitüsü Kurt Dili ve Kültürü Anabilim Dalı, kenansubasi@artuklu.edu.tr, ORCID ID: 0000-0001-7744-1646.

## Evaluation of Kurdish Child Poems in the Context of “Child Relativity” and “Child Reality”

### Abstract

In this article, a literary analysis is made in the framework of the two main principles of children's literature, child reality and child relativity. Since the child has a different and unique personality, an author of children's literature should consider this difference and authenticity in his art of writing. Because the first payer of this literature is the child himself. It is also a matter of writing a work according to these principles, in which the child is given literary pleasure and literary aesthetics. According to these opinions, Kurdish children's poems will be examined according to these two principles. In the application part of the work, from the past to present, Zêwer, Goran, Kakeyî Felah, Kamiran Elî Bedirxan, Letîf Helmet, Elî Ebdulla Şewnim, Emîn Muhemed, Taha Bîlal, Elî Hemereşid Berzîncî, Osman Muhemed Hewramî, Fırat Cewerî, Konê Reş, Yehya Elewîferd, Aram Gernas the poems of poets such as Mueyed Teyîb will be evaluated. At the end of this examination, according to these principles, successful and weak examples of poetry will be shared. Especially the selection of these poets is that they are the most prominent names in the field of children's poetry in their time. Of course, new ones can be added to these poets. However, since it would exceed the size of an article, we limited this work to the above names and evaluated the above-mentioned poets by dividing them into four periods within the context of their historical period, social and political events.

**Keywords:** Poem, Child, Kurdish, Child Reality, Child Relativity.

### Extended Abstract

It is said that poetry differs from other literary works in terms of imagination, sensitivity, rhythm and in terms of the use of symbols, metaphors, metonymy and many other linguistic aesthetics. Also among the linguistic aesthetics that emphasize poetry more is the repetition of sounds (alliteration) and of course rhyme (Oğuzkan, 2013: 250). These two aesthetics both give a musical rhythm to the words as well as facilitate pronunciation and expression.

When poems are written for children, they are written according to certain goals such as love of one's own language, art education, imagination development, mind education, responsibility education, community awareness and education for values. Of-course these are important points for children and should be included in literary products. But even more important is how this topic in these literary genres will be designed and given and as a reader, in what position will the child come into contact with these literary products and genres. Because, for the influence of a literary text, the method of writing, narrating and displaying are as important as the interesting side of the subject. In this regard, especially in the context of literature for children, two notions or two main methods emerge, one of which is the child reality and the other is the child

relativity. These two notions, although distinct from each other, are in fact very close to each other and complementary.

According to German children's literature, Peter Schneider divides the child reality into four stages or serenades, which are referred to as physical reality, artistic reality, educational reality and critical reality. Although this division has been applied to German literature, in reality these four sections are remarkable stages for a complete literature, in other words for the proper modern literature.

Apart from the child reality, another important point was the child relativity, which according to the nature, interest, need and language of the children, in terms of form, content and teaching is a literary product design that should not be far from the view of children and it must incorporate all literary and aesthetic features. In other words, the child relativity is the definition of certain principles of literary production according to the age and development of the child. Also for a complete children's literature, there is a dual relationship between the relativity and reality of the child.

Based on the above principles, we also evaluated Kurdish children's poetry in this study, and before evaluating, we divided children's poetry into periods according to chronology. This can be divided into five periods in addition to the folklore productions in the written culture and the first of these periods is referred to as the classical period which was more about the education and training of children. The second period can be referred to as the Gelawêj and Hawar period. Poets like Zêwer, Pîremêrd, Faîq Bêkes, Kamiran Bedirxan, Hisênen Emîn, Evdilla Goran, Şakir Fettah, Eladdîn Seccadî lived in this period and composed poems, songs and march for children. The third period lasted from the 1950s to March 11, 1970. At this period, poets like Fereydûn Elî Emîn, Kakey Felah, Elî Ebdulla Şewnîm, Remzî Qezaz wrote poetry. The fourth period begins after the March 11 pact and continues until the early 1990s. People like Letif Helmet, Kazim Koyî, Osman Hawramî are some of the poets of this period. The fifth period, which is currently the final period, begins after the 1990s and is still ongoing. There are representatives of this period in almost every part of Kurdistan. In South Kurdistan poets like Emîn Mihemed, Elî Heme Reşîd Berzincî, Daykî Xelat, Emîn Gerdigilanî, Taha Bîlal, Ako Mihemmed Sabîr, Cemal Sabîr, Mueyed Teyîb, Mihemed Emîn Doskî and many others are working in this field. In East Kurdistan, people like Yehya Elewîferd and Selah Nîsarî are the most prominent names. In North Kurdistan, Firat Cewerî and Aram Gernas have written about this subject. In West Kurdistan, Konê Reş has written about this subject. Among these poets, Yehya Elewîferd, Konê Reş, Mueyed Teyîb and Mihemed Emîn Doskî can be considered as representatives of North Kurdistan because they write in Kurmancî dialect.

In short, we come to the conclusion that since the early 1940s and onwards there has been a remarkable unification of Kurdish children's poetry and that it has undergone many changes in terms of quantity and quality until the last period. Of course according to the child reality and relativity as to how in the beginning it was not generally successful until the last period this weakness remained except for a few poets.

## Kurte

Di vê gotarê de analîzeke analîtik di çarçoveya du hêmanên sereke yên edebîyata zarokan de dê bê kirin. Ev hêman “rastîya zarokan” û “îzafîyeta zarokan” in ku bingeha edebîyata zarokan a modern ji li ser wan saz dibe. Ji ber ku zarok xwedî kesayeteke cuda û xweser e, nivîskarê edebîyata zarokan di hunera xwe de mecbûr e baldarê vê cudabûn û xweserîya zarokan be. Lewra mixatabê sereke yên vê edebîyatê zarok bixwe ye. Ji bilî van ji bo ku zarok bibe xwedî estetîk û arezûyeke edebî, dîsa divê berhemên edebî yên ku ji bo zarokan têن nivîsandin, li gorî van her du hêmanan bêñ afirandin. Li gorî van esasan di vê xebatê de dê helbestêن zarokan ên Kurdî li gorî van her du hêmanan bêñ nirxandin. Herwiha quesda me ji helbestêن zarokan ên Kurdî ew e ku ji destpêkê heyâ iro yanî ji helbestvanê weku Zêwer, Goran, Kakeyî Felah, Kamiran Elî Bedirxan, Letîf Helmet, Elî Ebdulla Şewnim bigirin heyâ kesên weku Emîn Muhemed, Taha Bîlal, Elî Hemereşîd Berzinçî, Osman Muhemed Hewramî, Fîrat Cewerî, Konê Reş, Yehya Elewîferd, Aram Gernas û Mueyed Teyîb binirxînin û mînakên helbestêن wan ên serkeftî û neserkeftî, digel egerên wan, parve bikin. Mebest ji hilbijartina van navan ew e ku ev helbestvan di serdema xwe de yên herî berhemdar bûne di qada helbesta zarokan de. Helbet mimkûn e mirov hin navêñ din lê bar bike. Lê ji ber ku dê ji sînorêñ gotarekê derketiba, me bi van navan sînordar kir. Herwiha me helbestvanê ku hilbijartiye, di nav çar serdemêñ ku tê de jîyane û li gorî milmilaneyêñ sîyasî û civakî ji hev cuda bûne, dabeş kirin.

**Bêjeyêن Sereke:** Helbest, Zarok, Kurdî, Rastîya Zarokan, Îzafîyeta Zarokan

## Destpêk: Helbestê û Zarok

Derbarê helbestê de gelek pênase hatine kirin. Her pênaseyek li gorî nêrîneke seksî hatîye sêwirandin û para rastîya her pênaseyê jî li gorî xwe heye. Lê ya muhîm ji pênaseyê zêdetir, bersivandina vê pirsê ye ku helbest hunereke çawa ye? Çimkî dibe ku her pênase ji hin alîyan ve kêm bimîne. Lîbelê dema mirov bi çarçoveyeke berfireh çawanîya tiştekî nirxand û vekola, dê encameke duristtir peyda bibe. Loma ji bo helbestê tê gotin ku ji alîyê xeyalkirinê, hestîyarîyê, aheng û rîtmê û ji alîyê bikaranîna hêma, metafor û metonomî û gelek ciwankarîyên din ên zimanî ve ji berhemên din ên edebî cuda dibe. Herwiha di nav ciwankarîyên zimanî de yên ku helbestê zêdetir serincrakêş dikin; dubarekirina dengan (alîterenasyon) û helbet serwa (qâfiye) ye (Oğuzkan, 2013: 250). Ev her du ciwankarî hem rîtmeke mûzîkaît didin gotinan hem ji di jiberkirin û vegotinê de hêşankarîyê çê dikin. Xisûsen cîbicîkirina van ciwankarîyan ji bo helbestên zarokan pir girîng e. Lewra zarok heya salêni navbera 12-18an de ji ji alîyê zimanî ve di nav geşedaneke lezgîn de ne (Yavuzer, 2012: 91) û helbest ji yek ji hunerên zimanî ye ku piştgirîyeke zêde dide prosesa geşedanê. Helbet ne tenê geşedan, xweşaxaftin, bikaranîna bêjeyêne dewlemend û vegotina meram û meqsedê bi awayekî tam û zelal ji bi tesîra helbestê pêş dikevin û baştir dibin. Li gorî pexşanê kurtbûna hevokên helbestan ji taybetîyeke wê hunerê ye ku ji alîyê xwendin, jiberkirinê ve dibe avantajek ji bo xwîneran. Bi taybetî heke xwîner zarok bin, ev taybetî maqûltir dibe (Ed. Güneş, 2013: 155)

Weku gelek zewq û tecrubeyan, estetîk û hunera edebîyatê jî bingeha xwe ji çaxa zarokatîyê digire. Ji bo xwendineke tam û kîrhatî û ji bo pêşxistina şîvana nivîsandinê, rûbirûmayîna bi edebîyateke xurt re pir girîng e. Ev yek jî hema hema ji alîyê geşedanê ve ji çaxa ku zarok bîrewer dibin û dest bi axaftinê dikin û pê ve dest pê dike. Heta gelek zanyar dibêjin ku berî van astêne geşedanê û dema pitikayîyê ji bi xwendina lorîkên xewê, zarok teşireke dengî, edebî û muzîkê digirin (bnr. Yavuzer, 2012; Bacanlı, 2005). Dema ku helbest ji bo zarokan têne nivîsandin, li gorî hin armancêne weku hezkirina ji zimanê xwe, perwerdekirina hunerî, pêşxistina xeyalkirinê, perwerdekirina zêhnê, perwerdekirina berpirsîyarîyê, naşîna civakê û perwerdekirina ji bo nirxan têne nivîsandin (Ed. Güneş, 2013: 155-157). Helbet ev xalêni girîng in ji bo zarokan û divê di berhemên edebî de hebin. Lê ji wê jî girîngtir ev babet di van cureyên edebî de dê çawa bêne sêwirandin, dayîn û weku xwînerek, zarok dê di kîjan pozîsyonê de bi van berhem û cureyên edebî re mixatab bibe. Çimkî ji bo tesîra metneke edebî, bi qasî balkêşîya mijarê rîbaza nivîsandin, vegotin û nîşandayîna wê jî girîng e. Di vê babetê de bi taybetî di çarçoveya edebîyateke ji bo zarokan de du çemk an ji du rîbazên sereke derdi Kevin holê ku yek ji van rastîya zarokan e û ya din ji ïzafiyeta zarokan e (Dilidüzungün, 2007: 58-94). Ev her du çemk her çîqas ji hev cuda bixuyêñ jî di rastîyê de pir nêzî hev in û hevtemamker in.

Di vê gotarê de ev her du çemk dê bi awayekî berfireh bêne pênasekirin û paşê helbestên zarokan ên Kurdî li gorî van çemkan dê bê nirxandin û dê di

encamê de dîyar bibe ka kîjan helbestvan û helbest di vî warî de serkeftî bûye û herî zêde nêzî rastî û îzafiyeta zarokan bûye. Yanî ya esas di vê xebatê de analîzeke analîtik a helbestên zarokan ên Kurdî ye ji hêla rastî û îzafiyeta zarokan ve. Di hilbijartina helbestvanê vê xebatê de mebest ew e ku ev helbestvan di serdema xwe de yên herî berhemdar bûne di qada helbesta zarokan de. Helbet mimkûn e mirov hin navê din lê bar bike. Lê ji ber ku dê ji sînorêngotarekê derketiba, me bi van navan sînordar kir. Herwiha me helbestvanê ku hilbijartiye, di nav çar serdemên ku tê de jîyane û li gorî milmilaneyên sîyasî û civakî ji hev cuda bûne, dabeş kirin. Ji ber ku me helbesta zarokan a Kurdî bi parçeyeke Kurdistanê tenê ve sînordar nekir, me ji çar parçeyan helbestvan destnîsan kirin û ji wan mînak dan û nirxandina helbestên wan kirin. Lê ji ber hin sedemên sîyasî, civakî û perwerdeyî li her parçeyê helbestên zarokan bi qasî hev nebûne warê balkêşiyê. Loma di vê gotarê de dê giranîya helbestnûsên Başûr (bi zaravayê Soranî) bê dîtin. Çimkî ji salên 1930yî û vir de helbesta zarokan berevajîyê parçeyên din, babeteke zindî bûye li layê Başûriyan.

Armanca sereke ya vê gotarê nasandin û nirxandina helbest û helbestvanê zarokan ên Kurdî ye. Ji ber ku li bakurê Kurdistanê heyâ niha xebateke bi vî rengî nehatibû kirin, kêm be ji ev xebat dê vê valahîyê dagire. Herwiha di gel nasandin û haypêxistina xwîneran, armanceke din a vê xebatê ji nirxandina selîqeya helbestên zarokan ên Kurdî ye ku gelo çiqas serkeftî ye? An ji lazim e çiqas û çawa serkeftî be? Helbet li gorî her du çemkên me dîyarkirî ku weku rastîya zarokan û îzafiyeta zarokan tê zanîn.

## 1. Rastîya Zarokan

Di vî warî de yên ku cara ewil nirxandinê xwe parve kirine, lêkolînerên Ewropî ne. Bi taybetî li Almanyayê kemîlin û pêşketina edebîyata zarokan di merheleyeke dûr û dirêj de bi awayekî sîstematîk çê bûye, baştır hatîye zanîn divê berhemeyeke edebî ji bo zarokan û bi taybetî ji bo zarokêna roja me çawa bê nivîsandin. Lewra kesekî bi navê Peter Schneider li gorî edebîyata zarokan a Almanan rastîya zarokan dabeşê çar qonaxan an ji serenavan kirîye ku ev weku rastîya şikîlî, rastîya hunerî, rastîya perwerdeyî û rexneyî hatine binavkirin (Schneider, 1984: 38; vgz. Dilidüzungün, 2007: 58). Her çiqas ev dabeşkirin li ser edebîyata Almanan hatibe sepandin ji di rastîya xwe de ev her çar beş ji bo edebîyateke kamil a giştî, yanî ji bo edebîyata serdema modern a tekûz merheleyê berbiçav in.<sup>2</sup> Ne tenê di edebîyata Almanan de, di gel guherîna cîhanê û nêrîna mirovayetîyê, di edebîyata neteweyê din de ji dixuyê. Loma me xwest em qala beşen rastîya zarokan di edebîyatê de bikin û guherîna helbesta Kurdî ya zarokan ji bi van rêgezan binirxînin.

<sup>2</sup> Her çiqas zarokan li welatêna cuda di nav devdor û çandine cuda de mezin dibin ji ji hêla zarokatîyê ve ango rastî û îzafiyeta xwe ve heman mexlûq in. Loma di vê xalê de ji erdnîgarîyê bêtir diyardeya zarokatîyê muhîm e ku divê bê pênasékirin û naskirin. Ev ji li gorî disiplinêna weku pedagoji, psîkoloji û hwd. pêk tênu ku bi awayekî sîstematîk pêşî li Ewropayê xebatêna van waran de xuya bûne.

### 1.1. Rastîya Şikilî

Piştî sedsala 18an derkete holê. Ji ber ku armanca sereke şîretdayîn, perwerdekirina rasterast û li gorî tesewûra mezinan afirandina zarokatîyek bû, ev rastî ji şikilguherandinê wêdetir neçû. Berî ku berhemên bi vî rengî bêñ nivîsandin, cureyên weku çîrokên gelêrî, efsûnî, mîtolojîk û fabl hebûn û armanca van cureyan jî şîret û pend bûn. Loma bi tenê weku şikilguherandinek hat xuyakirin. Çimkî di vê serdemê de ji cureyên gelêrî cudatir mijarêñ weku ji jîyana rojane ya zarakan û têkilîya wan a bi dayîk û bav û hevalêñ wan re dihatin sêwirandin û di van sêwirandinan de mînaka zarokatîya herî kîrhatî weku zarokêñ xwedî fezîlet (fezîleta ku civak tayîn dike), zarokêñ ku hedê xwe dizane, zarokêñ ku guhdañya gotinêñ mezinan dike, ji bo civakê dihat nîşandan. Yanî her çiqas mijar ji jîyana rojane ya zarakan bîhata sêwirandin jî rolêñ zarokan ên civakî dihatin danîñ ku ev yek bi temamî bi çavêñ mezinan çê dibû. Ji ber van yekan e ku derbarê rastîya şikilî de tê gotin ku yan bi rastî û nîrîna polîtîkaya perwerdeyê ya wê serdemê re têkildar e yan jî ev rastî û nîrîna nivîskar bixwe ye (Dilidüzungün, 2007: 58-60). Ji ber ku rastîya nivîskar di navendê de ye û zimanê pend û şîretê serdest e, ev rastî ne li gorî rastîya zarokan e û tûşê gelek rexneyan bûye ji vî alîyê ve. Herwiha otorîterî di vê rastîyê de pir berbiçav e û ev otorîte weku tilîyen bilindkirî yên li ser serêñ zarokan e ku rastîyêñ xwe li wan dibañne (Dilidüzungün, 2007: 60-65). Endîşeya yekem a otorîterîyê; perwerdekirina zarokan e û xetereya mezin jî bêyî ku bi awayekî rexneyî bifikire, xwînerek her tişte ñu dixwîne weku rastî qebûl bike û li gorî wî hereket bike ku ev jî bi temamî hizira afîrîner û rexneyî dikuje û teqlîdê ava dike.

### 1.2. Rastîya Hunerî, Haydarbûna ji Rastîya Zarokan û Antîotorîterî

Di vê serdemê de di şûna perwerdekirina zarokan de nîrîna zarokan cih girt. Zarok ji amûr û objebûnê derket bû kirde an jî navend. Tevgera Xwendekarêñ 1968an bû destpêkek ji bo edebîyateke bi vî rengî. Bi vê tevgerê re gelek guherînêñ aborî, polîtîk û civakî geşe dan. Sînorêñ di perwerdeyê de hatine rakirin û perwerdeya îdealîst cihê xwe daye perwerdeya rasteqîne. Zarok bûn kesêñ azad û herwiha divê ew nehatibana kontrolkirin (Dilidüzungün, 2007: 60). Di pirtûkêñ vê serdemê de zêdetir xîsûsîyeta hunerî bi awayekî “teqlîdkirina xwezayê” û “nîrîna bi çavêñ zarokan” giranîya xwe danî (Schneider, 1984: 39; vgz. Dilidüzungün, 2007: 60-61). Ji ber ku nîrîna bi çavêñ zarokan di vê serdemê de bû takileke sereke, antîotorîterî jî kete navenda edebîyata zarokan. Ji destpêka ku antîotorîterî di edebîyatê de bû helwestek û pê ve, di nav xwe de bi çend şêwazan derkete pêş. Di serî de helwesta antîotorîterîyê li dijî dibistanê, têkilîya di navbera mamoste û xwendekaran de, li dijî otorîteya malbatê û derdorê xwe nîşan da. Piştî, bi taybetî di edebîyata îroyîn de digel van sazîyêñ ku me hejmartî, zêdetir ev helwest li dijî otorîterîya nivîskar a di berhemê de xwe nîşan da (Dilidüzungün, 2007: 62-63). Divê nivîskar di berhema xwe de weku mamosteyekî serdest, xîtabî xwîner nekiriba. Berevajî wê divê dinyayeke sêwirandî bi xwîner re parve bikira û herwiha daketiba asta xwîner û xwîner di

navenda edebîyata xwe de mixatab bigirta. Ji bo rexneyek li helwesta mezin an ji nivîskaran a di vî warî de, nivîskara Alman; Susanne Kilian bi navê “Kindsein ist süß?” helbestek nivîsandîye (Stiller & Kilian, 1982: 36). Di vê helbestê de dixwaze bîbêje ku zarok ne bindestê mezinan in û dixwaze nişan bide ku zarok ji mezinan cudatir in. Yanî ew tiştên ku mezin ji xwe re dikin xem, ji bo zarokan ne xem e û mezin an zarokan fam nakin an ji naxwazin fam bikin. Herwiha divê mezin biryara ku dê zarok ci bikin an nekin, nede. Divê ji wan re çîma bikin an çîma nekin, rave bikin. Divê dem ji bo zarokan bê vegetandin û ew bêñ guhdarîkirin û famkirin. Wê ev nêrîn bi vî şikilî neqil kiriye:

**Kindsein ist süß?**

Tu dies! Tu das!  
Und dieses laß!  
Beeil dich doch!  
Heb die Füße hoch!  
Sitz nicht so krumm!  
Mein Gott, bist du dumm!  
Stopf's nicht in dich rein!  
Laß das Singen sein!  
Du kannst dich nur mopsen!  
Hör auf zu hopsen!  
Du machst mich verrückt!  
Nie wird sich gebückt!

Schon wieder ne Vier!  
Hol doch endlich Bier!  
Sau dich nicht so ein!  
Das schaffst du allein!  
Mach dich nicht so breit!  
Hab jetzt keine Zeit!

Laß das Geklecker!  
Fall mir nicht auf den Wecker!  
Mach die Tür leise zu!  
Laß mich in Ruh!  
Kindsein ist süß?  
Kindsein ist mies!

**Ma zarokatî xweş e?**

Wêya bike! Vêya bike!  
Destêñ xwe nede vêya û wêya!  
Piçek ecele bike!  
Lingen xwe ji ber min bikêşe!  
Wisa yekkêlekî rûnenê!  
Hey Xwedayo, tu çiqas ker î!  
Wisa weku çavbirçyan nexwe!  
Bes e kilaman nebêje!  
Tu tenê dikarî bêyî destûr tiştan bigirî!  
Her gav xwe hildipekînî û dipengizî!  
Tu min dîn dikî!  
Her gav serhişkîyan dikî!

Aha dîsa notêñ te zeîf in!  
De hadê here ji min re bîrayekê bîne!  
Serguhê xwe qirêj meke!  
Her gav min mijûl meke!  
Piçek maqûl rûne!  
Dema min beredayî xerc meke!

Tiştan tevlihev meke!  
Min aciz ji meke!  
Derî hêdîka bigire!  
Li ser serê min nexe teqereq!  
Ma zarokatî xweş e!  
Nexêr zarokatî kurreder e!<sup>3</sup>

### 1.3. Rastîya Perwerdeyî û Rexneyî

Ev her du rastî hevtemamker in. Lewra di serî de zarok weku heyîneke pasîf dihat dîtin û weku kesayeteke ku bi tenê divê bê perwerdekirin û di vê perwerdekirinê de ji ci bê gotin, divê bêyî îtfîrazekê ew gotin bihatana qebûlkirin.

<sup>3</sup> Wergera vê helbestê min ji ber wergera wê ya Tirkî (bnr. Diliidügün, 2007: 64) kir û paşê bi alîkarîya hevalekî Almanîzan me wergera min a Kurdi, bi helbesta resen re berawird kir.

Ev yek helbet bi otorîteya mezinan, malbat û dibistanê re ji peywendîdar bû. Yek ji kesên ku li dijî vê şêwazê derketîye Jean Jacques Rousseau ye ku wî di berhemâ xwe ya bi navê Emile de nîşan daye ku divê zarok azad be, ew bi tecrubeyan jiyanê nas bike û heta J. J. Rousseau, li dijî fablxwendinê û şîretêne wan ên rasterast derketîye û ji bo zarokan xwendina vê cureyê erê nekirîye (bnr. Rousseau, 2011). Belkî mirov dikare bibêje ku cara yekem li hemberî perwerdeyeke req û hişk bi awayekî rexnegirî J. J. Rousseau helwest nîşan daye. Îcar rastîya rexneyî di vir de derdikeve holê ku li gorî P. Schneider piştî ku ev rastî hat famkirin, nêrînên pedagojiya rijd û nerînên yekalî, yekrastî, yekqebûl berteref bûn û cihen xwe ji nêrîna rexneyî û rasteqîne re hiştin. Berhemên ku bi nêrîna rexneyî hatin sêwirandin, rastîya civakê û perwerdeyê derxistin holê û otorîteya wan a li ser edebiyata zarokan şikand. Bi gotineke din nivîskarîya yekalî û yekrengî dabeşî piralî û pirrengîye bû û gelek dengê cuda derketin (vgz. Dilidüzungün, 2007: 65).

Dîsa ji nav rastîyen zarokan Peter Härtling, xwe di nav rastîya rexneya civakî de dibîne û dibêje ku zarok heyînên wisa ne ku gelek tiştî cara ewil tecrube dikin. Cara ewil hez dikin, nefret dikin, hevalek wan çê dibe, derdikevin rîwîtîyekê û gelek tiştîn din. Ev hemû ji bo wan cara ewil pêk tê (vgz. Dilidüzungün, 2007: 68). Loma dema ku mijareke bi vî rengî ji bo zarokan hat sêwirandin divê nivîskar ji rastîya wan dûr nekeve. Vê yekê bi kitêba xwe ya bi navê Ben liebt Anna/Benjamin Anna'yi Seviyor (Ben ji Annayê hez dike) tîne ziman ku di vê pirtûkê de evîn û hezkirina du zarokan û di nav alema wan de bêyî ku ji rastîya wan dûr bikeve berhemâ xwe disêwirîne (bnr. Härtling, 2016). Bi rîya vê berhemê didezanîn ku hezkirin, evîn herçiqas ne weku ya mirovên mezin be ji di rastîya zarokan de ji cih digire. Herwiha şerma civakê ya ku nahêle mirov bi rahetî hestîn xwe bi hev re azadane parve bikin, P. Härtling bi rîya Ben û Annayê, wê şermê û psîkolojîyê bi çavekî rexneyî nîşan dide. Loma ji li gorî wî divê nivîskarê edebiyata zarokan bi çavekî rexneyî bi şertê ku ji rastîya zarokan dûr nekeve, berhemâ xwe binivîse.

## 2. Îzafîyeta Zarokan

Weku pênameyeke giştî îzafîyeta zarokan; li gorî xweza, eleqe, hewcedarî û alema ziman a zarokan, ji alîyê şikilî, naverokî û fêrkarîye ve sêwirandineke berhemeye edebî ye ku divê hem ji nêrîna zarokan dûr nebe û hem ji hemû taybetiyê edebî û estetîk di xwe de bihewîne (Sever, 2003; Dilidüzungün, 2007). Bi gotineke din îzafîyeta zarokan, li gorî temen û geşedana zarokan dîyarkirina hin esasen berhemên edebî ye (Ed. Hunt, 2005). Herwiha ji bo edebiyateke tekûz a zarokan, di navbera îzafîyet û rastîya zarokan de peywendîyeke dualî heye. Li gorî îzafîyeta zarokan nivîskar, han dide ku rastîya zarokan di berhemâ edebî de nîşan bide û bi alîkarîya îzafîyeta zarokan, bikare bi awayekî serkeftî, sê sitûnên berhemâ edebiyata zarokan ku ji şikil, naverok û pedagojiyê pêk tê, bi awayekî serkeftî bi kar bîne. Bi vî hawî zarok xwe dikare zêdetir di nav berhemê de bibîne

û bala xwe bidê û jê zewq bigire (Çer, 2014: 3). Dîsa derbarê peywendîya îzafiyet û rastîya zarokan de Sever dibêje hunermendê ku bixwaze berhemên edebî yên zarokan, li gorî îzafiyeta zarokan bisêwirîne, divê pêşî bi rastîya zarokan bawer bike û bizane ku nivîsandina li ser navê vê rastîyê, berpirsîyariyeke pir giran e (Sever, 2003: 22).

Helbet heyamên gesedanê û gesedana zarokan, eleqe, hewcedarî û gelek taybetîyên wan ên din ji bo famkirina îzafiyeta wan girîng in. Lê di çarçoveya van hemû têgehan de bersiva pirsa nivîskarek dê çawa bikare li gorî îzafiyeta zarokan tevbigere, bi kurtî wiha ye: “Heke nivîskar bikaribe zarokatîyê hîs bike.” Lê ji vê ji muhîmtir dê çawa hîs bike? Di vê derê de têgihîştina rastîya zarokan dikeve dewrê ku ew ji heke nivîskarek bikare bi çavêن zarokan binêre, bi hişen wan bifikire, bi guhêن wan bibihîze, bi dilên wan hîs bike û ji van hemûyan girîngtir heke nivîskarek bikare van hemûyan bi zimanê wan vebêje, dê wê çaxê bi ser keve û li gorî zarokan berhemên edebî û estetîk biafirîne.

### 3. Helbestên Kurdî yên ji bo Zarokan

Helbest weku hunereke edebî di tarîxa zimanê Kurdî de hem qedîm e hem ji cihekî pir fireh digire. Herwiha di edebîyat û perwerdeya zarokan a Kurdî de ji herî zêde ev cure pêş ketîye û berhem jê hatine afirandin. Çimkî weku nerîtek ji berê heya niha li ser helbestê tecrubeya Kurdî pir zêde hatîye ceribandin. Loma ji alîyê edebî ve serkeftirîn cure ji dîsa helbest derdikeye pêş di zimanê Kurdî de. Ji bilî çawanîya xwe, ji alîyê çendanîyê ve ji herî zêde dîsa di vê cureyê de berhem hatine nivîsîn û afirandin (Mehmûd, 2004; Hewramî, 2007; Ehmed, 1998; Barzinji, 2010; Ehmed, 2005; Ferhadî, 2013). Ji bilî berhemên folklorîk di nav çanda nivîskî de helbestên ji bo zarokan di Kurdî de di nav pênc qonaxan de dikare bê dabeşkirin û ji van qonaxan a yekem weku qonaxa klasîk tê binavkirin ku zêdetir li ser perwerdekirin û fêrkarîya zarokan bû (Qadir, 2016: 30-32). Di vê qonaxê de zêdetir ferhengên manzûm û eqîdename hatine nivîsîn ku destpêka vê hunerê ji alîyê Ehmedê Xanî ve bi berhema Nûbara Biçûkan di sala 1682yan de dest pê kirîye. Helbestên di vê qonaxê de bi piranî teqlîda Nûbara Biçûkan bûne ku ji hêla naveroka xwe ve dikevin nav rastîya şikilî ya zarokan ku armanca wan a sereke perwerdekirin, nesîhetdayîn û şîretkirina zarokan bûye. Ji hêla dîroka qebûlkirin û girîngîpêdana zarokatîyê, ev berhem şayanê teqdîrê ne û hêja ne ji bo xebatên Kurdî yên di vî warî de. Lê em ê di vê xebatê de cih nedin vê qonaxê ku wek qonaxa destpêkê an ji li gorî me binavkirî qonaxa yekem e. Ji ber ku ev gotar dê bi taybetî li ser helbestên modern ên zarokan raweste, lewra em ê nirxandina qonaxa yekem nekin û weku du çemkêن modern di çarçoveya “rastîya zarokan” û “îzafîyeta zarokan” de nirxandina helbestan ji qonaxa duyem bidin destpêkirin.

### 3.1. Qonaxa Duyem

Ev weku qonaxa *Gelawêj* û *Hawarê* jî dikare bê binavkirin.<sup>4</sup> Çîmkî zêdetir ji alîyê nivîskarên van kovaran ve di wê serdemê de helbesta modern a ji bo zarokan derketîye holê. Taybetîya herî berbiçav a vê qonaxê ew e ku helbest zêdetir bi awayên sirûd û honraweyan hatine nivîsandin. Armanca sereke ya helbestnûsên vê qonaxê ji alîyê niştimanperwerî ve hişyarkirina zarokan e. Loma zimanekê otorîter û naverokeke pedagojîk serdest e. Bi rastî dema ku mirov bi edebîyata cîhanê re jî berawird dike, normal e ku ev yek di helbesta Kurdî de jî hebin. Lewra di navbera salên 1920 û 50an de edebîyata cîhanê bixwe jî ji alîyê rastîya zarokan ve di qonaxa rastîya şikîlî de ye. Yanî hêj zimanê otorîter û padagojîyeke zext li kar e û di edebîyatê de navend e. Her çiqas bi giştî wiha be jî carinan mirov hin nimûneyên ku pir nêzîkî rastîya zarokan û izaflîyeta zarokan bûne jî dikare bibîne. Kesêن weku Zêwer, Pîremêrd, Faîq Bêkes, Kamiran Bedirxan, Hisênen Emîn, Evdilla Goran, Şakir Fettah, Eladdîn Seccadî di vê qonaxê de jîyane û ji bo zarokan helbest, sirûd û honrawe ristine. Em ê di vê qonaxê de helbestên Zêwer, Hisênen Emîn û Kamiran Bedirxan û Evdilla Goran<sup>5</sup> binirxînin.

#### 3.1.1. Zêwer

Di sala 1875an de li Silêmanîyê hatîye dinê. Maweyeke dirêj mamostetî kirîye. Dîwaneke wî ya helbestan heye ku tê de helbestên wî yên ji bo zarokan jî cih digirin. Di nav kovara *Gelawêj* de xebitîye. Ji bilî helbestan xebatên ferhengnûs û wergêrîyê kirine. Di sala 1948an de koça dawî kirîye (Qadir, 2016: 36). Di helbestên Zêwer de perwerde, amojgarî û niştimanperwerî pir zêde dixuye. Ji ber ku ziman otorîter û ji izaflîyeta zarokan dûr in carinan tê famkirin ku bi alema kesekî temenmezin hatine nivîsîn.

Min mindalî biçükim, mektebe roh û serim  
Be se'yî û xoşî xoşî, dersim ekeme berim  
Se'yî ger mandûm eka şadîm dersim rewane  
Mindalê ke temel bê xwêrî naw kolana ne  
Dinya çawî roşin bû be sayey 'îlm û fen bû  
Ey refiqanî mekteb rojî 'îlm û 'îrfane (Zêwer, 2008: 221)

Di vê mînakê de Zêwer xwe xistîye şûna zarokekî biçûk û xwestîye bi rêya karakterekî wiha, hezkirina dibistanê û xwendinê bide zarokan. Lîbelê hebûna nivîskar di helbestê de carinan pir zêde tê hîskirin. Taybetîyeke zarokên serdemâ dibistana seretayî, navîn û pêşdibistanê ew e ku zêdetir xwe difikirin û bi meseleyên derdorê xwe re eleqedar in. Loma bi saya ilm û fenê ronîbûna dinyayê dê ji wan re tiştekî pir dûr û razber bixuye. Ji bo zarokekî di vî temenî de pir awarte ye ku gotineke bi vî rengî bike. Yek jî dersjiberkirin an jî karên weku vê

<sup>4</sup> Helbet berî van kovaran çend nimûneyên helbestên zarokan di kovarên din ên Kurdî de derketibûn (bnr. Tek, 2019). Lê heya Hawar û *Gelawêj* bi zanetî xabeteke serbixe bo zarokan nehatibû meşandin. Ev yek di Hawar de weku "Sitûna Zarowan" û di *Gelawêj* de weku "Beşî Mindallan" xuya bûn. Ev egera sereke ye ku me vê qonaxê bi van her du kovaran da destpêkirin.

<sup>5</sup> Hem ji ber ku navêñ herî zêde derketine pêş, me hilbijart hem jî ji bo em ji qwareya gotarekê dernekevin, me her kesekî ji bo zarokan nivîsibe, nexist nav nirxandinê.

monoton, zarokan zûtir aciz dike. Dema ku nivîskar dibêje “be xoşî xoşî dersim ekeme ber” dîsa ji rastî û nêrîna zarokan dûr ketîye û gotina xwe gotîye. Ji bîlî vê cureyê ji bo niştimanperwerîyê jî weku sirûd gelek berhem dane ku yek ji wan destpêka wê li jêr hatiye dayîn û helbet di vê sirûdê jî rastîya şikili serdest e û ji alîyê metafor û zimanî ve jî têgihiştina wê zehmet e:

Ême ke mindal û newciwanîn  
Hemû be qurbanî Kurdistanîn  
Çunke hubbî weten le îmane  
Be mehebbete sahêb îmanîn  
Sa ey refiqan le rêy weten da  
Zor tê nekoşîn zor bê wîcdanîn (Zêwer, 2008: 213)

Herwiha ji bîlî van helbestan hin helbestêñ Zêwer hene ku pir nêzî rastî û nêrîna zarokan bûye. Yek ji wan helbesta bi navê “Se’at” e ku di her du rêzikên dawî de nivîskar û otorîteya wî dixuye. Weku din bi temamî li gorî xeyal û alema zarokan hatîye ristin.

Se’atekey min ciwan û be kar e  
Royînî weqtan deka jimare  
Ke dewrey şew û rojî tewaw bû  
Dûbare sazî ekem zûbezû  
Paş û pêş naka be yek deqîqe  
Zorim xoş ewê weku refiq e  
Her karîm bê be wî rêk ekem  
Be tertîbêkî zor baş û mehkem  
Her kes be tertîb rêk neka karî  
Rêkupêk nabê hemû kardařî (Zêwer, 2008: 235-236)

### 3.1.2. Hisênenê Emîn

Li Qubînê di sala 1919an de hatîye dinê. Di eslê xwe de ji bo zarokan tekane helbesta wî ya ku li ber destê me ye bi navê “Marşa Tîpan” sirûdek e ku li ser fêrkarîya alfabeteyê nivîsiye. Her çiqas ji qelema Emîn nimûneyek tenê jî hatîbe nivîsandin, ji ber ku ev sirûd bi zimanekî pir sade û bi melodîyeke serkeftî hatîye sêwirandin, di edebîyata zarokan a Kurdî de cihê xwe girtîye. Otorîterî di zimanê helbestê de qet nayê hîskirin û ev taybetî bixwe jî kirîye ku ev sirûd zêdetir bê xwendin.

Em şagird in, em dixwînin abc  
nivîsandin, ew ji bo me armanc e  
tipen me tev sîh û yek in çde  
xweşî ev e, bi zimanê kurmanc e

**êfgh** him rehet e, him şêrîn  
**iijk** xweş dixwînim bi qîrîn  
**lmno** hê mayîne hinêñ din  
gelî Kurdan, werin tev de bixwînin

**pqrstuû** tu meyze  
**vwx** ne, ez şas nakim yek levze  
**heşt** dengdêr in, heçî **dengdar bîst** û **sê**  
rêya ronî dibistan e, ma **yz**. (Emîn, 1944: 15)

### 3.1.3. Kamiran Bedirxan

Ew di sala 1895an de li Stenbolê hatîye dinê. Karêñ weku mamostetîya zankoyê û kovaregerîyê pêk anîne. Derbarê ziman û edebîyata Kurdî de kitêb jî nivîsîne û bi navê Dilê Kurêñ Min dîwanekê helbestan jî nivîsîye. Helbestêñ di vê dîwanê de her çiqas bi temamî ne ji bo zarokan hatibin nivîsandin jî hin helbestêñ wê ji bo zarokan in. Bedirxan hema hema di dawîya hemû helbestêñ xwe de dixwaze peyamek bide xwîner an jî nesîhetek li xwîner bike. Exlebî peyama niştimanperwerîyê dide. Di helbestêñ xwe de carinan ji rastîya zarokan dûr dikeve û carinan jî li gorî zarokan li alemê temaşa dike. Heke ew amojgariyê rasterast di dawîya helbestan de nebûna, mirov dikarîbû bigota ku Bedirxan gelekî nêzî rastîya hunerî ya edebîyata zarokan bûye.

**Xweha min**  
 Xwişka min hê kiçik e  
 Nikare rêve biçe  
 Ez destê xwe didim wê  
 Bi min re pir xweş diçe  
 Her rû min re dibêje  
 Kekê min ê dilovan  
 Çîrokekê bibêje  
 Ji jîyîna nêçîrvan  
 ... (Bedirxan, 2014: 18)

**Kitêba Min**  
 Kitêba min spehî ye  
 Kitêbeke pir mezin  
 Tê de her tişt dibînim  
 Kuşîlk, kitik, berx, bizin. (Bedirxan, 2014: 19)

Di helbesta “Xweha Min” de ji rastîya zarokan dûr dikeve. Lewra şayesandina zarokekê dike ku hêj nikare bi rê ve biçe, lê di çarîna duyem de wê zarokê dide axaftin û gotinên mezinekî pê dide gotin. Ev yek ji rastîya zarokan dûr e. Di helbesta “Kitêba Min” de bi çavêñ zarokekî li tiştan dinêre. Heya 10 salîya xwe zarok tiştên xwe bêqisûr û pak dibînin an jî tişta ku ya wan e, dixwazin ku pak û bêqisûr be. Yek jî bi metafora kitebeke ku tê de wêneyêñ kuşîlk, kitik û berxikan heye, tezadek çê dike ku ew li ber çavêñ zarokan pir mezin dixuye. Her çiqas di çarîna dawî ya vê helbestê de dîsa derbasî zimanê nesîhetê bûbe jî di her du çarînê ewil de nêrîna zarokan a li ser tiştan serkeftî nîşan daye. Mirov dikare bibêje ku tam bi devê zarokek peyivîye.

### 3.1.4. Evdilla Goran

Di sala 1904an de li Helebcayê hatîye dinê. Demeke zêde mamostetî kirîye li devera Helebcayê. Di wextê mamostetîya xwe de ji bo zarokan helbest û sirûd dînîse. Goran helbestvanekî pir berhem e di edebîyata Kurdî de. Hin formêñ nû yên weku opera, metelok bi kar anîne (bnr. Goran, 2005: 34-36). Di helbesta “Saway Aştîxwaz” de Goran dixwaze peyama aşitîyê ragihîne zarokan û bi devê zarokek helbesta xwe sêwirandîye. Lê dîsa jî tesîra nivîskar û otorîteya wê ya di helbestê de tê hîskirin. Ji alîyê peyam û neverokê û nermbûna ziman ve problema helbestê tuneye. Lê nivîskar di vir de nekarîbûye bi awayekî pisporane bi çavêñ zarokan vebêje. Ji vê helbestê benda ewil û ya dawî bi vî şîklî ne:

Minalêkim korpey naz  
 Wek bawkî xom aşitîxwaz

Kotirî sipîyî teqlebaz  
Le çeqel ekem derbaz  
Minalêkim, minalêkim, aşitîwaz  
Emca merce ta mawim  
Be zimanê parawim  
Goranîyi aşitî bilêm  
Aşitîyi rûnakî çawim  
Minalêkim, minalêkim, aşitîwaz (Goran, 2005: 318)

Dî helbesta “Goranî Denike Genim” de Goran nêzî nêrîn û alema zarokan bûye. Ya ku di vê helbestê de Goran nêzî van krîteran kirîye, yek jê peywendîya zarokekekî cotkar û denkegenima wî ye. Goran bi hesasîyeta zarokekî nêzî denkegenimê dibe û serborîya wê ya toxim û şînbûnê vedibêje. Dema ku vê yekê vedibêje, hin endîşeyê ku bi tenê zarok dê bikevinê, tîne ziman weku “Eygrê Xwa / Her kesê bixwa / Denike Genimim” piştî ku mar, mişk û kêzên nav axê dijmêre û vê endîşeyê jî li dû wan rêt dike. Hin metaforêni bi vî rengî her çiqas helbest pir dirêj be jî nêzî rastî û îzafîyeta zarokan kirîye. Her du bendêñ ewil ên helbestê wiha ne:

Nawî Xway lê ehênm  
Derkî 'embar eşkênm  
Be bar genim derdênm  
Lenaw werda eyçênm  
Wek altun zerde  
Pak û bê gerde  
Denike genimim...  
Pole çolekey ser cil!  
Mişkî naw kun! kirmî cil!  
Wirde merî sirk û sil!  
Toxum weşand pirî be dil!  
Eygirê Xwa  
Her kesê bixwa  
Denike genimim... (Goran, 2005: 322)

### 3.2. Qonaxa Sêyem

Piştî kutabûna qonaxa *Gelawêj* û *Hawarê* vê qonaxê dest pê kirîye û ev qonax ji salêñ 50an bigire heya peymana 11ê Adara 1970yan dewam kirîye. Di vê qonaxê de li Kurdistanê ji alîyê edebî ve çalakî herî zêde li başûr nîşan dane. Bi rastî li her sê parçeyên din bêdengî hakim bûye. Loma jî ji alîyê edebiyata zarokan ve jî berhemên nivîskarên başûrî di vê qonaxê de derketine pêş. Her çiqas li dinyayê di vê serdemê de hin raperîn û reform çê bûbin û vê yekê tesîrê li edebiyatê jî kiribe û edebiyat zêdetir ketibe reyeke azadane û antîotorîter jî tesîra xwe zêde li vê qonaxa helbesta zarokan a Kurdî nekirîye. Çimkî hêj jî amojgarî û nesîhet, pend û şîret bi zimanekî otorîter li dar e. Ferqa vê qonaxê ji berî xwe ew e ku dîwanê taybet ên ji bo zarokan hatine dahênan. Kesêñ weku Kakey Felah ku bi helbestnûsiya zarokan navdar bûne derdi Kevin pêş. Di vê qonaxê de kesêñ weku Fereydûn Elî Emîn, Kakey Felah, Elî Ebdulla Şewnim, Remzî Qezaz helbest nivîsandine.

### 3.2.1. Kakey Felah

Li Şarbajêra Silêmanîyê hatîye dinê. Kakey Felah bi navê Cîgergoşekan, Çiro, Çolekepasarî, Mal û Qutabxane, Şêrî Saxte, Operêt û Demeteqê û çend berhemên din nivîsandine. Ev berhem bi giştî bi navê Pepûlekan di yek dîwanê de hatine civandin. Kakey Fekah ji bilî helbestnûsiyê karêن sîyasî û rojnamenûsiyê jî kirine û di sala 1990an de koça dawî kirîye.

Felah di helbestên xwe de ji amojarâ û nesîheta rasterast zêde dûr neketîye. Zimanekî hêsan bi kar anîye. Lê otorîteya xwe asteng nekirîye û carinan ji nêrîna zarakan dûr ketîye. Ne pir zêde be jî di hin helbestên xwe de li gorî nêrîn, rastî û ızaflîyeta zarakan nivîsandîye û metafor û hêmâyên ku dê xeyalên zarakan pêş bixin, bi kar anîye. Di helbesta “Amojarâ” de weku serenava helbestê, zimanê ku bi kar anîye bi giştî zimanekî ji derveyê zarakan û şîretamêz e. Bi rastî ev helbest weku mamosteyên ku tilîyên wan li ser zarakan her gav bilindkirî ne, dixuye. Ziman kêm zêde bi raweya fermanî hatîye kişandin û zarok bixwe di nav helbestê de nîne. Zarok li derveyî helbestê û weku mixatabê vegêrê helbestê hatîye sêwirandin. Çend rêzîkên serî wiha ne:

Rollekanim! Rolley ça bin  
 Gullî naw baxçey hîwa bin  
 Guy şîl ken bo amojarîm  
 Be dill, be gîyan le gel ma bin  
 Êwe nemamî baxék in  
 Be destî ême nêjra bin  
 Baxçey êweş mall û mekteb  
 Aza û zîrek û wirya bin  
 ... (Felah, 2009: 61)

234

Di helbesta “Xalxaloke” de Felah bi devê zarokek pirsan li xalxalokekê dike û ji ber şîyana firîna xalxalokê xwezîya zarokê bi xalxalokê tîne. Xalxalok jî weku mixatab bersiva zarokê dide û tiştên ku dixwaze dibersivîne. Di vê helbestê de midaxeleya nivîskar naxuyê. Ji alîyê alema zarakan ve jî baş hatîye sêwirandin. Lewra xwezî û hêvîyên zarakan di rastîya wan de nîşan daye. Helbest bi vî şîklî dest pê dike:

Xalxaloke  
 Malî xalim li ku ye?  
 Tu eyzanî  
 Le şar e ya le dê ye  
 Be şîwêni to da  
 Min firînim hez lê ye  
 Xozge wek to  
 Balim egirt lem rîye  
 Ta bizanîm  
 Malî xalim le wê ye!  
 ... (Felah, 2009: 15)

### 3.2.2. Fereydûn Elî Emîn

Di sala 1933yan de li Silêmanîyê hatîye dinê. Li Şarbajêr û Silêmanîyê mamostetîya dibistana seretayî kirîye. Gelek berhem ji bo zarokan nivîsiye. Helbest û çîrok nivîsîne û ji edebîyata cîhanê bo Kurdî werger kirine. Palewanî Diway Roj, Pîyawî Biçkoleke, Karjole, Pakjî, Genimeşamî û gelek berhemên wî yên din hene. Cureyên helbest û kurteçîrokê di berhemên wî de exlebî bi hev re hatine nivîsîn (Mîrza & Mistefa, 2006: 9-10).

Gelek helbestê wî yên ji bo zarokan, li gorî alema zarokan hatîye sêwirandin. Helbet tesîra zimanê otorîter û edebîyateke bi padagojîyê dagirtî li ser heye. Lîbelê li gorî yên berê xwe nimûneyên serkeftîtir dane. Di helbestê xwe de teknîka dîyalogê bi kar anîye. Ev teknîk ji aîiyekî ve wî serkeftîtir kirîye. Bi rîya vê teknîkê karibûye midaxeleya xwe ya li ser vegêre ïzole bike. Di helbesta “Mîwan” de hem dixwaze bi zarokan bide zanîn ku divê ders û dewrên xwe temam bikin hem jî lîstik û yarîyê piştî temamkirina dersan bilîzin. Lê di vegotinê de qayîdedanîn û otorîteyeye sext tuneye. Helbestê bi awayekî wisa disêwirîne ku di nav dîyaloga mîvan û mazûvanîyê de bi mataforeke serkeftî vê yekê nîşan dide. Çend rêzên serî yên vê helbestê wiha ne:

Teq, teq, teq, teq  
Bo bê deng î ey dergay req  
Teq, teq, teq, teq  
Kê ye ew e? Danexrawe  
Ger mîwan e le ser çaw e  
Ewey êmey ïn û mîwan ïn  
Hawrêy Sîrwan û Soran ïn  
Dersîyan ger nûşîwetewe  
Erowîn bo yarî pêkewe  
Ey bi xêr bêñ mîwanekan  
Maltan pirr kird le gullî ciwan  
Ders û dewr tewaw bûwe  
Katî yarî xoş hatûwe  
... (Mistefa & Mîrza, 2006: 82)

Di helbesta “Min Minalim” de Emîn, her çîqas di nav helbestê de xwe kiribe zarokek jî bi temamî bi devê xwe an jî bi devê otorîteyek axivîye. Gotinên ku gotine bi temamî rast bin jî ji ber ku jî ïzafîyeta zarokan dûr e, nikare zêde tesîrê li zarokan bike. Lewra zarokek naxwaze ku mezinek her tiştî ji bo wî bike, ew dixwaze her tiştî bi destê xwe bike. Di vê helbestê de mirov dibê qey zarokek, mezinekî daye hemberî xwe lê nesîhetan dike û kirin û nekirinên wî jê re dijmêre. Ev yek bawerîya rastîyê jî dişikîne. Çend rêzikên ewil ên helbestê wiha ne:

Min minalim, dil nasikim  
Êsk sükim, kar asikim  
Swêskê û barekewî şaxim  
Pepûle û bilbilî baxim  
Pêm bixwinin, fêrim biken  
Perwerdem ken, têrim biken  
Nexoş kewtim derman ken  
... (Mistefa & Mîrza, 2006: 44)

### 3.2.3. Elî Ebdulla Şewnim

Di sala 1929an de li Helebcayê hatîye dinê û di sala 2020an de wefat kir. Bi navê Cerîwe dîwaneke wî ya helbestên zarokan heye. Şewnim, herwiha honrawe û stran jî çê kirine. Di helbestnûsîya zarokan de ferqeke wî ji helbestnûsên dewra xwe tuneye. Di nav sedan helbestên wî de pir zêde helbestên ku nêzî rastî û ïzafliyeta zarokan bûbe tunene. Di nav helbestên wî de helbesta bi navê “Nîyaz” li gorî krîterên helbesta modern a zarokan a cîhanê pir serkeftî ye. Şewnim ziman û nêrîna zarokan di vê helbesta xwe de serkeftî nîşan daye. Di vê helbestê de jî teknîka pirsîyar û dîyalogê heye. Herwiha nîşandayîna xwestek û hêvîyên zarokan bi rîbazeke azadane daye. Helbest di dawîyê de şîretek dide lê ne bi devê otorîteyek bi devê mixatabê karakter an vegêr vê yekê nîşan dide. Helbest bi giştî wiha ye:

- 1- Em pirsîyare hawrêkanim  
Welam welam ba bizanim  
To çît ewê?
- 2- Xwardin û xew  
1- To çît ewê?
- 3- Kotir û kew  
Ey to ... Ey to...
- 4- Cil û pare  
Yarîkirdin ta êware  
1- He he ... He he ... Pêkenîne  
Xwaztekantan naşîrîne  
2,3,4:- Pê mekene, pê mekene  
Ey xwaztî to bayê çene  
1- Min? Min? Nîyazîm têkoşan e  
2- Rencî bîr e rencî şan e  
Bo serkewtin, bo zanyarî  
Bo şelanî nahemwarî (Muhammed, 2012: 55)

### 3.3. Qonaxa Çarem

Ev qonax piştî peymana 11ê Adarê<sup>6</sup> dest pê dike. Li ser vê peymanê li Başûrê Kurdistanê heya radeyekê azadî çê bû ku vê yekê jî pêşketina edebîyat û perwerdeyê leztir kir. Li parçeyên din hê jî tevger û livîneke berbiçav tunebûye. Lê di vê serdemê de xêncî Başûr li Ewropayê jî dîyasporayeke Kurdan çê bûbû ku vê yekê jî pêşî li afirînerîya edebî vekiribû. Çend kovarê zarokan piştî salên 1980yan li wir hatibûn derxistin.<sup>7</sup>

Edebîyata ji bo zarokan bi rewşa perwerdeyê ve girêdaye. Ji ber vê egerê li Başûr ji alîyê berhemdayîn û afirînerîyê de tevger û xebat hebûn. Çimkî li wir heya astekê mafê perwerdeya bi zimanê zikmaî hebû. Heke em vegerin ser helbestên

<sup>6</sup> Ev peyman di 11ê Adara 1970yan de di navbera rejîma Baas û alîyên Kurd de li Iraqê çê dibe û otonomîya herêma Kurdistanê tê naskîrin. Di encama vê peymanê de mafê perwerdeya Kurdi belavtir û zêdetir dibe ku vê tesireke erêni li qada edebîyata zarokan jî kiriye.

<sup>7</sup> Ev kovar bi navê Kuîlîk, Hêvî, Heval, Koçer, Kurdilekan, Hêlin û Hêvîya me dikarin bêñ binavkirin (Subaşı, 2018, 36-37) û di van kovaran de kesên weku Fırat Cewerî, Birîndar, Rêncber, Apê Xerîbo, Durust, Rizalîyê Reşîd û Xebatnas ji bo zarokan helbest nestivîsine.

vê qonaxê em dikarin bibêjin ku ziman xwerû û hêsanter bûye û her çiqas nimûneyên neotorîter hebin jî edebîyat ji şîret, pend û nesîhetên rasterast xelas nebûye. Kesêñ weku Letîf Helmet, Kazim Koyî, Osman Hewramî û Firat Cewerî çend helbestnûsêñ vê qonaxê ne.

### 3.3.1. Letîf Helmet

Di sala 1947an de li bajarokê Kifriyê hatîye dinê. Di warê helbestnûsiya zarokan de xwedîyê gelek berheman e. Di vê qonaxê de jî ji hêla hilberînerîyê ve kesê herî berbiçav e. Nêzî hevdeh pirtûkên wî yên helbest û çîrokan çap bûne (Qadir, 2016: 68-69). Ciwantirîn Dêh di sala 1979an de nivîsiye û piştre bi navê Dengxweşîrîn Mel, Hêlaneyekîtir, Minal û Baran, Mindal û Çoleke, Katjimêr, Gullî Naw Încaneke, Pirîs le Minal, Çolekey ser Dareke, Pirsîyarî Minal, Minal û Bukeşûseke, Mang le Nêwan Hezar û Yek Estêre da Dexewê hin ji pirtûkên wî yên ji bo zarokan in (Helmet, 2013). Ev berhemên wî bi giştî piştre di dîwanekê de hatine civandin û çapkiran.

Her çiqas pir zêde helbest ji bo zarokan nivîsîbe jî li gorî hilberînerîya wî pir zêde helbestêñ ku gihiştibe rastî û îzafiyeta zarokan tunene. Pend û şîretên rasterast di nav helbestêñ Helmet de jî dixuyêñ û carinan zimanê otorîter jî bi kar tîne. Lê hin nimûneyên helbesta wî hene ku ziman, nêrîn û alema zarokan pir baş ferq kirîye û di wan helbestan de sêwirandîye. Helmet bi metafora xewnê baştir karibûye îzafiyeta zarokan nîşan bide. Herwiha wî jî teknîka dîyalog û pirsîyarê bi kar anîye û bi vê rîyê serkeftîtir bûye. Di helbesta “Xewn”ê de berî raketinê qala xeyalêñ zarokekî dike û bi xeyalkirinê re bixewreçûyîna zarok jî nîşan dide. Vê sêwirandinê bêyi ku bixwe midaxele bike bi temamî bi çav, hîzr û xeyala zarokan vegotîye. Çend risteyê ewil ên helbestê:

Min xewnêkî xoşim dî  
Mang hatibû bo ser zewî  
Le şewî enguste çawa  
Meley ekird le awa  
Be dirêjayî şew ta beyan  
Mangî dem bi xende û ciwan  
Le gel sedan masîyî wîrd  
Her yarı û meley dekird  
... (Helmet, 2013: 191)

Di helbesta “Firîn”ê de Helmet bi rîya pirs û dîyalogê û metaforeke mîzahî û bi nêrîneke zarokane gotinêñ xwe disêwirîne. Li gorî gotina Hartling a ku dibêje zarok her tiştî nû û cara ewil tecrube dikin û jîyanê û heyînê li cîhanê hêdî hêdî nas dikin, Helmet jî di vê helbestê de bi rîya mîzahê xwestîye hin tiştîn şâş bi rîya pirs û bersivê bipirse û bi bersivê rast bike. Bi vî şîklî hem zarok perwerde dibe hem jî bi mîzaha ku danîye kîf û zewq ji gotinan digire. Helbest bi giştî wiha ye:

-Firî firî kerwêşk firî  
-Sinorî asman birî  
+Kerwêşk nafirê na na

Baz dedat û radeka  
 -Firî... firî gull firî  
 Berew asman be kipî  
 +Gull bê bal e nafirê  
 Le ser liqî dar denwê  
 -Bûkeşûsekem degirî  
 Degirî degirî bo dayikî  
 +Bûkeşûşeke dayikî nîye  
 Nazanê giyran çî ye  
 Be dirêjayı roj û sal  
 Pêdekenê bo minal  
 Mindallekanîş debê  
 Ewyan zor zor xoş boyê (Helmet, 2013: 244)

### 3.3.2. Fırat Cewerî

Fırat Cewerî di sala 1959an de li Nisêbîna Mêrdînê hatiye dinê û berî ku derbeya leşkerî ya sala 1980yan çê be, derbasî Swêdê bû û heya niha jî li wir e. Wî ji wan salan ve hem nivîskarî hem jî heya demekê weşangerî kirine. Herwiha wî bêtir ji bo mezinan nivîsiye û heya niha nêzî cil berhemên wê di warê roman, kurteçîrok, helbest, werger û lêkolînê de belav bûne. Her çiqas bêtir bo mezinan nivîsîbe jî wî di salên 1980yan de di Kovara Kulîlkê de çend helbest bo zarokan weşandine û herwiha di sala 1983yan de dîwanike helbestên zarokan a bi navê Dê Şêrîn e çap kirîye (Cewerî, 1983). Ji bilî helbestan wî çend berhemên nivîskara navdar a zarokan a Swêdî Astrid Lindgrenê jî wergerandine Kurdî. Dema ku meriv bala xwe dide helbestên zarokan ên Cewerî nivîsandî, bi giştî nebe jî meriv pê derdixe ku Cewerî xwe gîhandîye alema zarokan û karîye bi çavên wan li dinyayê temâşe bike. Bo nimûne di helbesta bi navê "Hewşa Dibistana Me" de bêyî ku midaxale li nêrîna zarokatîyê bike, xwe xistîye şûna zarokekî û bi zimanê wî hewşa dibistana xwe şayesandîye.

Hewşa dibistana me  
 Herçar alî lêkirî  
 Hundir hewşê de bexçe  
 Jêrî wê rezê tirî

Her sibe ku ez diçim  
 Berî têkevîm dersê  
 Ez zû bexçe av didim  
 Bi satil û tenekê

Ez ber leman çêdikim  
 Bi tevrî û bi bêrê  
 Pelên ku hişk jê dikim  
 Ji bonî gul pê ve bê  
 ... (Cewerî, 1983)

Cewerî dîsa di heman temaya dibistanê de ji bo ku çûyîna dibistanê bi zarokan bide xweşkirin helbesteke bi navê "Wer Em Herin Dibistanê" nivîsiye. Herçiqas bi zimanekî hêsan gotibe jî ji nêrîn û alema zarokan dûr ketîye û ji dêvla wê bi nêrîn û xwesteka mezinekî xweşbûna çûyîna dibistanê sêwirandîye. Helbet

dîyardeyên ku xwestiye veguhezîne zarokan gerdûnî ne û ji bo zarokan mifadar in. Lê her zarok heta em dikarin bibêjin tu zarok xweşya dibistanê wisa rasterast nasêwirîne, bi metafora lîstikê yan jî metaforeke bi xeyalên zarokan mimkun bû ev yekbihata sêwirandin.

Gava diçim dibistan  
Ez piñ këfxweş dibim  
Ez guh didim mamostan  
Bi peyvên wan geş dibim  
...  
Werin gelî hevalan  
Wer em herin dibistan  
Bixwînin, binivîsin  
Bo em nemînin nezan (Cewerî, 1983)

### 3.4. Qonaxa Pêncem

Vê qonaxê li Başûrê Kurdistanê bi raperîna cemawerî di sala 1991an de dest pê kir û hê jî dewam dike. Li her sê parçeyên din ên Kurdistanê di salên 90î de ji ber ku Kurdan hin mafênen xwe yên rewa yên weku azadîya weşanê bi dest xistin, di edebiyat û berhemdayînê de tevger û livînek pêk hat. Xwendina bi Kurdî geşteb bû û vê jî han da ku bazara zimanê Kurdî piçek belav bibe. Dîsa di van salên dawî de ji ber hin bidestxistinên mafê zimanî weku dayîna zimanê Kurdî di çarçoveya dersên hilbijartî de li Tirkîyê bû sebeb ku ji bo zarokan berhem bêñ nivîsandin. Ji ber van egeran di vê qonaxê de hem helbestnûsêñ zarokan zêde bûñ hem jî li gorî berîya xwe helbestên di asteke baştır de hatin afirandin. Ew kemîlin û geşedana xwezayî xwe di vê qonaxê de di edebiyata modern a zarokan de jî nîşan da. Ëdî di vê qonaxê de mînakêñ antîfotorîter zêde dibin, helbestnûsêñ ku rastî û îzafiyeta zarokan baş fam dikin, derdi Kevin holê. Di vê qonaxê de temsîlkarêñ helbesta zarokan a Kurdî li hemû parçeyan çê dibin. Li Başûrê Kurdistanê kesêñ weku Emîn Mihemed, Elî Heme Reşîd Berzîncî, Daykî Xelat, Emîn Gerdigilanî, Taha Bîlal, Ako Mihemed Sabîr, Cemal Sabîr, Mueyed Teyîb, Mihemed Emîn Doskî û gelek kesêñ din di vî warî de xebatan dikin. Li Rojhelatê Kurdistanê kesêñ weku Yehya Elewîferd û Selah Nîsarî navêñ ku herî zêde derketine pêş in. Ji bakurê Kurdistanê mirov dikare qala Aram Gernas bike ku ew heya demekê li dîyasporaya Ewropayê bû û berhemên xwe jî zêdetir li wir nivîsin. Li Rojava Konê Reş di vî warî de nivîsiye. Ji van helbestnûsan Yehya Elewîferd, Konê Reş, Mueyed Teyîb û Mihemed Emîn Doskî ji ber ku bi zaravayê kurmancî nivîsîne, weku temsîlkarîya Bakurê Kurdistanê (zaravayê Kurmancî) jî dikarin bêñ hesabkirin. Jixwe dîwanêñ van helbestvanan exlebî li Bakur jî hatine çapkiran û belavkirin.

#### 3.4.1. Yehya Elewîferd

Di sala 1973yan de li bajarê Bocunwerda li ser parêzgeha Xoresanê hatîye dinê. Hem çîrokînus hem jî helbestvan e. Bi navê Bajarê Mîrîyan, Şelpe û Sêv, Weznîn Hêjâyî, Keskesor pirtûkîn wî hene (Elewîferd, 2012). Di helbestêñ xwe de zimanekî hêsan, fambar bi kar tîne û bi hevokên kurt dînivîse. Di gelek helbestêñ

xwe de bi çavêن zarokan karibûye li alemê binêre û heyâ jê hatîye xwe ji zimaê otorîter dûr girtîye. Pend û şîret bi awayekî veşartî bi rêya metafor û hêmayan hatine dayîn di helbestêن wî de. Elewîferd di dîwaneke xwe de li ser morîyan rêzehelbest nivîsîne û yet ji wan bi navê “Çiyavan” e. Di vê helbestê de ew morîyan dike çyavan û di nav malê de eşyayêن bilind ên weku balgîyan jî dike çîya û bi çavê zarokekî ku di nav malê de morîyan temaşa dike, helbesta xwe disêwirîne:

Mîrî<sup>8</sup> demek aram in  
 Demek lez in direvin  
 Ji kütelên balgîyan  
 Hildikişin, dîkevin  
 Ji ketinê natirsin  
 Ji ser serê balgîyan  
 Balgî mîna çîya ne  
 Mîrî mîna çiyavan (Elewîferd, 2013: 11)

Dîsa di helbestekê xwe de Elewîferd xwe dixe şûna zarokeke ku bi lîstokêن xwe re dilîze. Di vê helbestê de balê dikişîne ser rewşa zarokêن pêşdibistanê yên ku tiştêن necandar weku candar dihesibînin. Yanî li ser rewşa anîmîzmê ya ku di zarokêن pêşdibistanê de dixuye. Mesela carinan zarok dema bi bûka xwe re dilîzin, wê weku candarek dihesibînin û wisa muamele pê re dikin. Elewîferd di helbesta “Dayîk”ê de metaforeke bi wî rengî afirandîye û digel tezada “piçûk” û “bilind”ê, helbesta xwe ji jîyana rasteqîn ber bi jîyaneke xeyalî birîye:

Dê û bavên min  
 Baş û rind in  
 Ez piçûk im  
 Ew bilind in  
  
 Lîstokêن min  
 Law û bûk in  
 Ez bilind im  
 Ew piçûk in  
  
 Ez dayîk im  
 Ew xizan in  
 Hurmeta min  
 Pirr dizanin (Elewîferd, 2013a: 10)

### 3.4.2. Mueyed Teyîb

Di sala 1957an de li Duhokê hatîye dinê. Helbestnûs e û helbestêن ji bo zarokan jî nivîsîye. Bi navê Kepirê bi giştî 75 hejmar kovareke zarokan amade û belav kir. Zimanê helbestêن wî yên ji bo zarokan hinek giran e. Çend nimûne ne tê de di helbestêن xwe de zimanê otorîter, pend û şîretê bi kar anîye. Di hin helbestêن xwe de hestîyarîyeke bimubalexe bi kar anîye. Her çiqas di helbestêن wî de rastîya zarokan dabe nîşan jî ji alîyê sêwirandin û nivîsandinê ve ji îzafiyet û nêrîna zarokan dûr maye.

<sup>8</sup> Morî, di Kurmanciya Xoresanê de weku “mîrî” tê bilêvkirin.

Teyîb, di helbesta “Kewo” de hin rastîyên zarokan bêyî ku mataforekê bixemîlne û bi awayeke edebî bisêwirîne bi zimanekî fermanî bi devê otorîteyekê pend û şiretan rêz dike. Ev yek jî helbestê ji bo zarokan balkêş nake, beravajî wan ji helbestê dûr dixe. Helbesta navborî bi vî şîklî dest pê dike:

Kewo spêdê bixwîne  
Zaroka ji xew hilîne  
Dest û çavêt xwo bişon  
Nan û mastî xwo bixwon  
Pirça serê xwo şe ken  
Paşê biken karê xwo  
... (Teyîb, 2008: 8)

Teyîb, di helbesta “xwezî ez kovîyek bama ne kîvî” de xwestîye rexne li civakê, li bajarhezîyê bigire û bi rêya hestîyarîyê vê helbestê sêwirandîye. Lê di edebiyata zarokan de rêgezek jî ew e ku divê hest û hestîyarî hebe, lê hestîyarîyeke bimubalexe xeternak e (Sever, 2003: 130-131). Ev hestîyarî dibe sedem ku zarokan bixe nav trawmayê jî. Loma divê nivîskar dozaja hestîyarîyê baş eyar bike. Bi taybetî nivîskarên Kurd jî bo zarokên Kurd divê hay jî vê rêgezê hebin. Lewra Kurdan di nav gelek êş û azaran re jîyana xwe borandîye û zarokên wan jî ji vê yekê bêpar nemane û ji alîyê hestêna xwe ve hesas in. Ji ber van egeran ev helbest ji nêrîn û îzaffiyeta zarokan dûr maye.

Ez kovî me / Boyaxçî me  
Li binarê Garey / Gundekê hey / Min nedîtiye  
Lê ez xelkê wî gundî me  
Ez kîvî me / Zarokeka neh salî me / Ev e sê sal e boyaxçî me  
Mala min... / Kulkekê biçûk / Ji ax û bera / Li taxê gêjebera  
Tecawiz e / Ji hemî xanîyên tecawiz pêheltir e  
Ji hemîya nizimtir û tarîtir  
Rêka wî jî pesareke / Ji kêlîya şedayê riktir e!!  
Berî heşt sala / Hêşta ezê bi şîr bûm / Hêşta ez gelekî hûyr bûm  
Babê min rezê me firot / pezê me firot  
Mala me bar kire bajêrî û / em bûne bajêrî.  
Ez kovî me / Boyaxçî me  
Babê min / Mirovekî rîncber û hêmin  
Pale bû / Berî sê salan / Di dîwarekî da firî û mir..  
Dayka min/ Par ez û dapîra min hêlayn û şûy kir  
... (Teyîb, 2011)

Ji helbestên serkeftî yên Teyîb yek jê helbesta “Pênc Mêri”<sup>9</sup> ye. Di vê helbestê de nivîskar dixwaze zarokan fêrî hejmaran bike lê ne bi awayeke otorîter û padagojîyeke rijd. Bi metafora morîyan vê yekê pêk tîne. Bi tenê du risteyên dawî yên vê helbestê tunebûna, dê ji alîyê rêgezên helbesta modern a

<sup>9</sup> Li vir jî morî weku mîrî hatiye bilêvkirin.

zarokan ve helbesteke pir serkeftî bûya. Lewra jixwe hewcedarî bi her du risteyêن dawî tunene. Piştî sêwirandineke afirîner û vegêreke bi metafor hewce nedikir ku nivîskar di dawîyê de nîyeta xwe bi devê xwe eşkere bikira.

Pênc mêtî bûn, mêtîyên sor  
Hatin ji rêkeka dûr

Ba rabû reş kir esman  
Mêtîyek bir û çar jê man

Çar mêtî bûn, mêtîyên sor  
Hatin bi rê dor bi dor

Av rabû û bû tofan  
Mêtîyek bir û sê jê man

...  
Mêtîyên sor, pênc mêtî bûn  
Ne kêz û ne zêrî bûn

Zarok hatin lê xîrr bûn  
Fêrî hejmartinê bûn. (Teyîb, 2009: 10-11)

### 3.4.3. Aram Gernas

Aram Gernas ji Farqînê ye. Piştî xwendina înstîtuya Perwerdehîyê dest bi karê mamostetîyê kiriye. Di sala 1983yan da wek penaberekî polîtîk derketiye deriveyî welat û li Swêdê bi cih bûye. Wî bi navê Baxçeyê Zarokan helbest û stranêن zarokan nivîsîne. Ji bilî vê dîwanê wî gelek wergerên edebîyata zarokan ji zimanên bîyanî bo Kurdî kiriye. Ew hê jî li heyatê ye û carinan li bakurê Kurdistanê jî dimîne û dijî (Gernas, 2008: 4). Ji ber ku ew mamosteyê zimanê Kurdî bûye, alema zarokan heya radeyekê baş têgihiştiye. Lê di hin helbestêن wî de mirov dibîne ku ji rastî û îzafîyeta zarokan dûr ketîye. Esil di gelek helbestêن xwe de teknîkêن cuda bi kar anîne weku dîyalog, metafor, vegêrê zarok û hwd. Axir xuyaye ku di çend helbestêن xwe de rasterast ketiye nav şîret û fêrkarîya rasterast a di navbera mamoste û xwendekaran de. Mesela di helbesta “Tiral” de xwestiye ku nebaşîya tiralbûnê nîşanî zarokan bike. Lê ne ziman zimanê zarokan e, ne jî bi çavê zarokekî li wê babetê temaşe kiriye. Loma xwe ji rastîya şikîlî xelas nekiriye ku du bendêñ ewil ên helbestê bi vî rengî ye:

Xweperestê tiral  
Riswa û bê pergal  
Bi rûniştin û bi razan  
Bextewar nabe însan  
Xweperestê tiral  
Riswa û bê pergal  
Kar bike û zindî be  
Rabe û jêhatî be  
Bi ber û berhemdar be  
Zana û kêrhatî be  
Xweperestê tiral  
Riswa û bê pergal (Gernas, 2008: 116-117)

Gernas, ji bilî çend helbestêن weku ya jor, di gelek helbestêن xwe de karibûye dakeve asta zarokan û bi çavêن wan alemê temaşe bike. Mesela yek ji van helbestan a bi navê “Hevalê Min” e ku mane, qîmet û girîngîya hevaltîyê bi çavêن zarokekî bi serkeftî neqil kiriye. Du bendê ewil ên vê helbestê wiha ne:

Hevalekî min heye  
Meriv tim pê bawer e  
Hevalekî min heye  
Ji bo min ew pistgir e

Hevalê min heval e  
Hevalê min hêja ye  
Hevalê min heval e  
Hevalê min hêja ye

Ji hevalê xwe razî me  
Ji ber ew min şâ dike  
Hevalê min bi çîk e  
Derd û şahî par dike (Gernas, 2008: 100-101)

#### 3.4.4. Taha Bîlal

Ji Silêmanîyê ye. Bi navê “Palewan” pirtûkeke wî ya helbestêن zarokan heye. Her çiqas ji hêla rastî û îzafiyeta zarokan, helbestêن wî yên serkeftî kêm bin jî di hin helbestêن wî de rastî û îzafiyeta zarokan baş hatîye dîtin. Metafora xewê baş bi kar anîye û helbesta wî ya bi navê “xew”ê di vî warî de hêja ye.

Le xewma bûm be palewan  
Gayekem xistibûwe ser şan  
Dû flî beçke beçke  
Ram ekêsan be kuêçke  
Ke fûm ekird le şarı  
Ştiyan ekewte xwarê  
Marim girtibû be dan  
Serekeyim exworan  
... (Bîlal, 2009: 22)

243

#### 3.4.5. Elî Heme Reşîd Berzincî

Ew di sala 1961an de li Berzinceyê hatîye dinê. Li Silêmanîyê mamostetîya dibistana seretayî kiriye. Ji bilî helbestan çîrok jî nivîsîne (Berzincî, 2000: 68). Bi navê Sirûdî Kurdistan, Cejn, Aferîn û Yarîyî Bîrkarî çend pirtûkên wî hene. Zimanê helbestêن wî sivik û perwerdeyî ne. Kêm helbestêن wî bi zimanê antîotorîter hatine nivîsîn.

Di helbesta “Canta” de Berzincî hevaltîyê zarokek a bi çenteyê re sêwirandîye û weku vegêreke monolog zarok bi çenteyê xwe re dipeyive. Midaxeleya nivîskar tuneye û hestêن rasteqîne yên zarokekî ku ji bo eşyayêن xwe hîs dike, nîşan daye. Helbest bi vî şikilî ye:

Cantakem ey cantakem  
Cê hawrê bê hawtakem  
Tom xoş ewêt ta mawim

Etparêzim wek çawîm  
 Çunke le pîşî û drran  
 Le bîrdin û le baran  
 Hawrêy gîyanî be gîyanîm  
 Hoyê xoşî û kameranîm  
 Pertûkî pîr wata û ciwan  
 Eparêzî Cantagîyan (Berzincî, 2000: 11)

### 3.4.6. Konê Reş

Ew di sala 1953yan de li Qamişloyê hatîye dinê. Nivîskar û lêkolîner e. Du pirtûkên helbestan ji bo zarokan nivîsîye bi navê Sîpan û Jînê û Şagirtê Bedirxan im. Ji alîyê naverokê ve hin helbestên wî ne di asta zarokan de ne. Zimanê helbestên wî otorîter û giran in. Her çiqas hevokên kurt bi kar anîbe ji hin têgehêن ku dûrî alema zarokan in, bi kar anîye. Bêyî ku kompozîsyon û sêwirandineke estetîk hebe, tenê ji bo serwayê carinan bêjeyan li hev anîye. Di helbesta “Şagirtê Bedirxan im” de bêjeyêñ bikarhatî, dûrî zanîna zarokan e. Wî xwestîye bi devê zarokek helbestê bibêje. Lê pir eşkere tê hîskirin ku midaxeleya nivîskar tê de heye. Herwiha hin bêjeyêñ weku “sor” û “zaz” ku bixwe çê kirîye, di helbestê de bi kar anîye. Ji serî, navê û dawîyê helbest bi vî şiklî ye:

Ez pêşmergê welat im  
 Gerîlayê felat im

Welatê min Kurdistan  
 Warê bav û bapîran

Dêrsim, Zaxo û Botan  
 Hewlîr, Seqîz û Bokan

Sûndê dixwim bi Yezdan  
 Xwedanê şev û rojan  
 ...

Ez şagirtê welat im  
 Roja cengê labat im  
 ...

Zaz û Sor û Goran im  
 Şagirtê Bedirxan im (Reş, 2013: 56)

### 3.4.7. Emîn Muhemed

Ew di sala 1962yan de li Silêmanîyê hatîye dinê. Wi di gelek kovarêن zarokan de helbestên xwe belav kirine. Bi navê Helwest, Malî Baran, Hawrêy Nû, Goranîy Hewrekan, Xeyalî Minallane, Henge Wirdîle, Xewnî Çoleke dîwanêñ wî yên helbestên zarokan hene (Muhemed, 2012a: 24). Dikare bê gotin ku di nav helbestnûsêñ zarokan de helbestvanê herî serkeftî ye ku rastî û alema zarokan fam kirîye û li gorî wê helbestên xwe nivîsîne. Li gorî asta helbesta modern a zarokan a cîhanê helbestvanekî serkeftî ye. Em dikarin bibêjin ku Emîn Muhemed weku nivîskarek zarokatîyê hîs kirîye û karibûye xwe bigîhîne derûnîyeta zarokan û wan fam bike û bi çavêñ wan binêre. Muhemed, niştimanperwerîyê bi awayekî estetîk û edebî bêyî ku tu midaxeleyeke xwe bide

hîskirin di helbestên xwe de sêwiradîye. Ji bo mînak helbesta wî ya “Nîştiman” wiha qala niştimanperwerîyê dike:

Le xewma min mamosta bûm  
Le naw pola rawesta bûm  
Nexşey cîhanîm dana bû  
Wişkanî û aw, le yek cîya bûn  
Sewz û zerd û qaweyî û şîn  
Be şewey yek tabloy rengîn  
Nexşekeyan pêk hê nabû  
Hemû welatanî tîya bû  
Çawim gêra be seryana  
Be diwayî nawî Kurdistanâ  
Her le nexşeye ramabûm  
Be diyarîyewe hepesabûm  
Demewêt nîştimanim kû ye?  
Bo nabînim le hîç cê ye. (Muhammed, 2011: 19)

### Encam

Hunera helbestê yek ji hunerêne sereke yên edebîyatê ye ku ev yek bi awayekî şenber di edebîyata Kurdî de jî xwe nîşan dide. Ji ber ku helbest di edebîyatê de hunereke sereke ye, loma ji alîyê berhemên xwe ve jî dewlemend e. Herwiha di qada perwerdeya klasîk a serdemêne berê de û di qada edebîyata modern a zarokan de, helbest hunereke herî karîger bûye. Û axîrî di xebateke bi vî rengî de ji bo helbestên zarokan a Kurdî, encamên ku derketin holê, dibe ku wiha bênen rîzkirin:

Helbesta Kurdî ya zarokan weku pênc qonax hatin dabeşkirin. Ji ber ku ev gotar bi taybetî li ser helbestên serdema modern bû, qonaxa yekem a ku weku qonaxa perwerdeya klasîk tê zanîn, nehat nirxandin. Her çar qonaxên din bi rîzê wiha hatin polînkirin:

Qonaxa duyem zêdetir helbestên di navbera salên 1920 û 1950an de weku qonaxa kovara Gelawêj û Hawarê hat pêna sekirin. Di vê qonaxê de helbestnûsên weku Zêwer, Goran, Hisêne Emîn û Kamiran Bedirxan hatin nasandin û helbestên wan, li gorî rîgezênu ku di serî de hatibûn danîn, hatin nirxandin. Ev rîgez li gor du çemkên modern ên weku “rastîya zarokan” û “îzafîyeta zarokan” hatine eskerekirin. Di vê qonaxê de berawirdkarîyek di navbera helbestnûsan de nehat kirin, lê mirov dikare bibêje ku ji alîyê van krîterên dîyarkirî ve lawaz bûn. Bi rastî dema ku mirov bi hin helbestnûsên welatên cîhana sêyemîn re berawird dike, dîsa li gorî wê serdemê helbesta zarokan a Kurdî, ne di asteke xerab de bûye.

Qonaxa sêyem, di navbera salên 1950 û 1970yan de hatîye sînorkirin. Bi rastî weku qonaxeke berî peymana 11ê Adarê hatîye pêna sekirin. Xwemalîya berbiçav a vê qonaxê ew bûye ku cara ewil dîwanên helbestan ên serbixwe ji bo zarokan hatine nivîsandin û çapkîrin. Ji vê alîyê xwe ve ji qonaxa berî xwe vediqete. Her çiqas salên dûr û dirêj jî derbas bûbin, ji alîyê çendanîyê ve yanî

hejmara berheman ve pêşveçûn û geşedanek çê bûye, lê ji alîyê çawanîyê ve geşedan û pêşveçûneke wisa berbiçav naxuye. Ev ferq girîng e, loma piştî salên 1960an ji alîyê rastî û ïzaffiyeta zarakan ve hişyarî li cîhanê zêdetir çê bûye. Lê em tesîra vê hişyarîyê zêde di nav helbestên Kurdî yên vê qonaxê de nabînin. Di vê qonaxê de helbestnûsê herî girîng Kakey Felah e ku xwedîyê çend pirtûkên helbestan e. Kesên weku Fereydûn Elî Emîn û Elî Ebdulla Şewnîm ji di nav vê qonaxê de hatine nirxandin.

Qonaxa çarem, di navbera salên 1970 û 1990an de hatîye sînorkirin. Ev qonax bi peymana 11ê Adarê dest pê dike. Çimkî peymana 11ê Adarê ji alîyê maf û azadîya gelê Kurd ê Başûrê Kurdistanê ve weku qonaxeke tê hesibandin. Bi taybetî di warê perwerdeyê de bi xwe re hin azadî û pêşveçûn anîn. Di vir de weku xaleke navberê, em dikarin vê bibêjin; ji ber ku di kronolojîya qonaxa sêyem û çarem de li parçeyên din ên Kurdistanê bêdengî, bişaftin û rewşen neasayî hebûn, mirov rastî emareyeke edebîyata Kurdî ji zû bi zû nayê. Weku me li jor ji nîşan da li dîyasporaya Kurdan a Ewropayê hin xebat pêk hatibûn, lê ev ji bi serê xwe ne wek qonaxekê bû, belkî wek nefesekê bû. Çimkî dewama wê ji bi awayekî xurttir nehat. Loma di van her du qonaxan de ji ber tevger û dahênerîya xwe em mecbûr man başûrê Kurdistanê esas bigirin. Axiî bi giştî di qonaxa çarem de ji helbestnûsîya zarakan pêşveçûneke mezîn nedît. Di vê qonaxê de helbestnûsê herî girîng Letîf Helmet e ku nêzî 17 pirtûkên helbestan ji bo zarakan amade kirîye. Lê Letîf Helmet ji digel ev qas berheman, xwe nikaribûye ji zimanê otorîter xelas bike. Di nimûneyên vê serdemê de giranîya pend, şîret û amojgarîyê dewam kirîye. Mîna qonaxên berî xwe, nimûneyên ku li gorî rastî û ïzaffiyeta zarakan hatine sêwirandin, pir kêm hene.

Qonaxa pêncem weku qonaxa dawî, ji salên 1990an heya îro hatîye sînorkirin. Di vê qonaxê de ji alîyê maf û azadîyê ve li her çar parçeyên Kurdistanê, hin geşedan û pêşveçûn rû dane. Li başûr raperîna cemawerî û li perçeyên din ji reformên demokratik han daye ku edebîyat û weşana Kurdî ji pêşve biçe û rengên nû peyda bibe. Loma di vê qonaxê de di helbesta zarakan a Kurdî de pêşveçûneke berbiçav çê bûye. Li her çar parçeyan, helbestnûsên nû derketine û helbestnûsên ku karibûne bigihêjin rastî, nêrîn, alem û ïzaffiyeta zarakan, mora xwe li edebîyata Kurdî xistine. Ji alîyê rêgezên me diyarkirî ve di vê qonaxê de helbestnûsê herî serkeftî Emîn Muhemmed, Aram Gernas û Yehya Elewîferd hatine nirxandin. Dîsa her çîqas di vê qonaxê de kesên ku karibûne xwe bigihînin rastî û ïzaffiyeta zarakan hebin ji kesên ku li ser rîbaza klasîk mane û bi awayekî otorîter û pedagojîyeke rîjd helbestên xwe sêwirandine ji hene.

Weku gotina axîrî digel pêşveçûneke giran a helbesta zarakan Kurdî, mirov dikare bibêje ku îro nimûneyên di asta cîhanê de ji di Kurdî de hene. Di van çend salên dawî de ku êdî dinya ber bi alemeke elektronîk ve diçe, hewlîn edîbîn Kurdistan hene ku zarokên vê serdemê fam bikin û li gorî wan edebîyatekê biafirînin. Lewra rastî û ïzaffiyeta zarakan bi guherîna dinya û zarakan re diiguhere. Ev ji nîşan dide ku rêgezên me ne rêgezên statîk in. Berevajî, rêgezên

kînetîk û guherbar in. Bi guherîna dinyayê re zarok diguherin û bi guherîna zarokan re rastî û îzafiyeta wan diguhere.

### Çavkanî

- Bacanlı, H. (2005). *Gelişim ve Öğrenme* (11.bs.). Ankara: Nobel Yayın Dağıtım.
- Barzinji, A. S. A. (2010). *Edebî Mindallan le Gowarî Gelawêj da*. Silêmanî: Sardam.
- Berzincî, E. H. (2000). *Aferîn. Silêmanî: Ofset û Çapxaney Çiya*.
- Bedirxan, K. A. (2014). *Dilê Kurên Min*. İstanbul: Avesta.
- Bîlal, T. (2009). *Palewan (Çapî 2.)*. Silêmanî: Çapemenî Peyv.
- Cewerî, F. (1983). *Dê Şêrîn e*. Uppsala.
- Çer, E. (2014). *Edebiyatta Çocuk Gerçekliği ve Çocuğa Görelilik İlkelerinin İncelenmesi*. Yayımlanmamış Doktora Tezi, Ankara Üniversitesi Eğitim Bilimleri Enstitüsü, Ankara.
- Dilidüzungün, S. (2007). *Çağdaş Çocuk Yazını; Yazın Eğitimine Atılan İlk Adım*. İstanbul: Morpa Kültür Yayınları.
- Ehmed, N. (2005). *Seretayek Derbarey Serhelldanî Edebî Mindallanî Kurd*. Hewlêr: Çapxaney Wezaretî Perwerde.
- Ehmed, N. E. (1998). *Mindall û Edeb. Silêmanî: Çapxaney Rûn*.
- Elewîferd, Y. (2012). *Şelpe û Sêv. Îran-Qûm: Weşanên Emû Elewî*.
- Elewîferd, Y. (2013a). *Dayîk. Kovara Bûka Baranê*, İstanbul: Komel-Kurd, 3, 10.
- Elewîferd, Y. (2013). *Bajarê Mîrîyan, Îran-Qûm: Weşanên Emû Elewî*.
- Emîn, H. (1944). *Marşa Tîpan. Ronahî, Şam: Çapxana Tereqîyê*, 25, 15. <https://tirsik.net/danegeh/kovar/ronahi-1940/25.pdf>
- Felah, R. K. (2009). *Koy Şî'rî Mindallan û Operêtêkanî Kakey Felah*. Silêmanî: Sardam.
- Ferhadî, H. S. (2013). *Mindall û Edebî Mindallan*. Hewlêr: Wezaretî Rewşenbîrî û Lawan.
- Gernas, A. (2008). *Baxçeyê Zarokan (Çapa 2.)*. Diyarbekir: Şaredariya Bajarê Mezin a Diyarbekirê.
- Goran, E. (2005). *Dîwanî Goran*. Tehran: Neşr-î Panîz.
- Güneş, Z. (Ed.) (2013). *Okul Öncesinde Çocuk Edebiyatı* (4.bs.). Eskişehir: Anadolu Üniversitesi Yayınları.
- Härtling, P. (2016). *Benjamin Anna'yı Seviyor* (N. Neydim, Çev.). İstanbul: Günüşığı Kitaplığı.
- Helmet, L. (2013). *Dîwanî Mindallan (Çapî 3.)*. Kerkük: Komalley Ronakbîrî û Komalayetî Kerkük.
- Hewramî, H. K. (2007). *Edebî Mindallanî Kurd Dway Raperrîn* (Bergî 2.). Hewlêr: Çapxaney Dezgâyî Aras.
- Hunt, P. (Ed.) (2005). *Understanding Children's Literature* (2nd edn.). Oxon: Routledge.
- Stiller, G. & Kilian, S. (1982). *Nein-Buch für Kinder 'Hinterher ist man schlauer'*. Weinheim und Basel: Beltz und Gelberg Verlag.
- Mehmûd, F. M. (2004). *Şî'rî Mindallan le Edebî Kurdî da*. Silêmanî: Sardam.

- Mîrza, K. E. & Mistefa, S. (2006). Baranî Rengawreng; Koyî Berhemekanî Mamosta Fereydûn Elî Emîn. Silêmanî: Sardam.
- Muhemed, E. (2011). Xewnî Çoleke. Silêmanî: Birêwberayetî Xaney Simore Bo Mindallan.
- Muhemed, E. (2012). Cerîwe; Dîwanî E. E. Şewnim. Silêmanî: Birêwberayetî Giştî Kitêbxaney Giştîyekan.
- Muhemed, E. (2012a). Xeyalî Minallane. Hewlêr: Wezaretî Rewşenbîrî û Lawan-Çapxaney Rewşenbîrî.
- Öğuzkan, F. (2013). Çocuk Edebiyatı (10.bs.). Ankara: Anı Yayıncılık.
- Qadir, Z. R. (2016). Bi Zaravayê Soranî Helbestê Zarokan le Edebî Kurdî da: Zêwer-Goran-Letîf Helmet-Emîn Muhemed. Teza Lîsansa Biliind a Çapnebûyî, Zanîngeha Van Yüzüncüylê, Wan.
- Reş, K. (2013). Helbestên Zarokan; Sîpan û Jînê-Şagirtê Bedirxan im. Diyarbakır: Aram.
- Rousseau, J.J. (2011). Emile ya da Çocuk Eğitimi Üzerine (M. Baştürk-Y. Kızılçım, Çev.). Ankara: Kilit Yayınları.
- Sever, S. (2003). Çocuk ve Edebiyat. Ankara: Kök Yayıncılık.
- Subaşı, K. (2018). Girr û Gallî Mindallanî Kurd; Dîrokçeya Çapemenî û Medyaya Zarokan a Kurdî. İstanbul: Nûbihar.
- Tek, A. (2019). Evdirrehîm Rehmî Hekkarî û Berhemên Wî Yê Ji Bo Biçûk, Ciwan û Jinan. *The Journal of Mesopotamian Studies*, 4/1, 51-71.
- Teyîb, M. (2008). Aşitî û Vîyan. Duhok: Spîrêz.
- Teyîb, M. (2009). Me Nevêt Tundûtîjî. Duhok: Spîrêz.
- Teyîb, M. (2011). Xwezî Ez Kovîyek Bama Ne Kîvî. Duhok: Spîrêz.
- Yavuzer, H. (2012). Doğum Öncesinden Ergenlik Sonuna Çocuk Psikolojisi (34.bs.). İstanbul: Remzi Kitabevi.
- Zêwer, M. (2008). Dîwanî Zêwer (Çapî 2.). Hewlêr: Çapxaney Dezgâyî Aras.